

Matumuuna Naalackersuisut Inatsisartut Suleriaasaanni § 33 naapertorlugu aalajangiiffisassatut siunnersuut maanna saqqummiuppaat:

Kalaallit Nunaata eqqaani imartani aningaasaqarnikkut immikkut oqartussaaffigisani avatangiisit illersorneqarnissaat pillugu inatsisip allanngortinneqarneranik inatsisissatut siunnersuummik Namminersornerullutik Oqartussat ilaliinissaat pillugu Inatsisartut aalajangiiffigisassaattut siunnersuut.

(Nunalerinermut, Imminut Pilersornermut, Nukissiutinut Avatangiisinullu Naalackersuisoq)

Tunngaviusoq

Inatsisartut ukiakkut 2021-imi ataatsimiinnerminni aalajangerput, MARPOL-imut isumaqatigiisummi Ilanngussaq VI-mi Kalaallit Nunaata nunap immikkoortuatut tunuarsimaarfigineqarnera atorunnaarsinneqassasoq. Aalajangiineq tamanna tunngavigalugu maleruagassanik, inatsisip Kalaallit Nunaannut tunngasortaanut ikkussisoqartussanngorpoq. Kalaallit Nunaata eqqaani aningaasaqarnermut killeqarfimmi immikkoortumi imartami avatangiisinik innarlitsaaliuinissaq pillugu inatsit suliaassarfiuvoq angerlaanneqarsimanngimmat, taamaattumillu Naalagaaffimmi oqartussaasut tamatumunnga inatsisiliortuupput.

Saqqummiunneqartussaq nalilerneqarpoq Naalagaaffimmi oqartussaasunut pingaaruteqartoq HFO-mik inerteqquteqarnerup suliarineqarnissaanut angumersinissaq nunat tamalaat akornanni pisussaaffii assigalugit issittup imartaani 1. Juuli 2024 atuutilertussamik inerteqquteqalernissaa. Namminersornermut Inatsit tunngavigalugu Inatsisartut oqaaseqaataat Folketingimi saqqummiunneqannginnerani ilanngunneqassaaq. Oqaaseqaat kingusinnerpaamik 1. Februaari 2024 piareereersimassaaq, Naalagaaffiup tamanna aalajangiisuutissammagu immikkoortup pineqartup ukiakkut 2023-imi suliarineqarnissaa, qulaani pineqartut tunngavigalugit isiginiarneqarniassammata.

Naalagaaffimmi oqartussaasut inatsisissatut siunnersuummik suliaqarput pisinnaatitsisummi aalajangersagaqartumik, naatsorsuutigineqarpoq nalunaarummik pilersitsisoqarnissaanik atorneqartussamik, tamatumalli imarissavaa issittup imartaani HFO-mik atuisoqannginnissaanik aammalu assartuisoqannginnissaanik inerteqquteqarnissaq. Inerteqquteqarneq atuutilissaaq 1. Juuli 2024, umiarsuit tankillit qaleriinnik timitallit 1. juli 2029 tikillugu akuersisummi immikkut ittumik tunineqartarnissaat periarfissinneqassalluni.

Siunnersuut Naalagaaffimmi oqartussaasut Kalaallit Nunaata eqqaani aningaasaqarnermut killeqarfimmi immikkoortumi imartap avatangiisinik innarlitsaaliuinissamut inatsimmut ilaalernissaanut Inatsisartut akuersinissaannik qinnuteqarnerannut tunngasuuvoq.

Aamma naalagaaffimmi oqartussaasut inatsisissatut siunnersuutaanni allassimavoq, inatsisissatut siunnersuutip atuutilernerani aalajangersakkamik katersuuffiusumik, issittup imartaani heavy fuel oil-imik (HFO-mik) atuinissamut assartuussinissamullu inerteqquteqarnermut tunngassutilimmik nalunaarusiornissap qulakkeerneqarnissaanut siunertaqarfiusumik suliaqartoqarnissaa anguniarneqartoq. Danskit Avatangiisinut Ministereqarfiannit ilisimatitsisutigineqarpoq, nalunaarutip nunani tamalaani inatsisip Kalaallit Nunaanni atuutinneqartut naapertorlugit, aammalu kalaallit oqartussaasui attuumassuteqartut qanittumik suleqatigalugit suliarineqarnissaa naatsorsuutigineqartoq.

Naalakkersuisut missingiummut oqaaseqaataat

Naalagaaffimmit oqartussaatur inatsisissatut siunnersuutaat MARPOL-imut isumaqatigiisummi Ilanngussaq VI-mi Kalaallit Nunaata nunap immikkoortuatut tunuarsimaarfigineqarnerata atorunnaarsinneqarneranut atasutut isigineqassaaq. Tamatumunnga peqatigitillugu Naalakkersuisut nalunaarummik, imartamut maleruagassiuffiusumik suliaqarput, kiisalu danskit inatsisissatut siunnersuutaat atorlugu aningaasaqarnermut killeqarfik immikkoortoq maleruagassiuunneqarluni. Naalagaaffimmi oqartussaatur inatsisissatut siunnersuutaata aamma Naalakkersuisut inatsisissatut siunnersuutaata suliarineqarnerinut atatillugu danskit kalaallillu oqartussaasuisa akornanni qanittumik oqaloqatigiittoqarpoq. Oqaloqatigiinnerup inernerisaanik inatsisissatut siunnersuutit marluusut taakku sapinngisamik pitsaanerpaamik ataqatigiissinneqarput

Siunnersuutip matuma akuerineqarneratigut kalaallit aningaasaqarnermut killeqarfianni immikkoortumi imartami avatangiisinut maleruagassat nutarterneqarnissaat qulakkeerneqassaaq.

Aningaasaqarnikkut aamma allaffissornikkut pisortanut sunniutaasussat

Soqanngilaq

Namminersorlutik inuussutissarsiortunut aningaasaqarnikkut allaffissornikkullu sunniutaasussat

Danskit inatsisaannut aamma imartami avatangiisinik innarlitsaaliorneqarnissaannik Inatsisartut inatsisaannut atatillugu aningaasatigut kinerunerisassat assigiinngissuteqarnissaat naatsorsuutigineqanngilaq, taakkunani ikummatissamik atuinissamut, MARPOL-imi isumaqatigiisummut ilanngussaq IV-imi erseqqissaatigineqartumut killiliissutaasut assigiimmata.

Ineqarnermut Attaveqaasersuutinullu Naalakkersuisoqarfimmiit tusarniaanermi akissuteqaatip ingerlateqqinneqarnerani paasineqarpoq, Royal Arctic Line-p orsussamut ikummarsaatikitsumut nuunna tamanna ingerlatseqatigiiffiup ukiumut 12 mio. koruuninik aningaasartuuteqarnerulerneranik, aammalu nassiussinermut akit 1,6 %-inik qaffannerinik kinguneqarsinnaasoq. Imarsiortunut dieselimut (MGO) nuunneq Royal Arctic Line-mut ukiumut 44 mio. koruuninik aningaasartuuteqarnerulersitsissasoq, aammalu nassiussinermut akit 5,7 %-inik qaffannerinik kinguneqassasoq naatsorsuutigineqarpoq. HFO-p inertequtaalernerata aamma Royal Arctic Line-p ikummatissamut allamut nuunnerata kingunerisaanik innuttaasut aningaasaqarnikkut eqqugaasussaapput.

Tamatuma peqatigisaanik erseqqissaatigineqassaaq, Royal Arctic Line 2029-miit HFO-mik atuilluni angalasinnaajunnaassammat, maanna inatsisip allannguutissaata imaa apeqqutaatinnagu, MARPOL-imi isumaqatigiisummut Ilanngussaq VI-imi nunap immikkoortuanut tunuarsimaarfiginninneq atorunnaarsinniarlugu Inatsisartut aalajangersimammata. Taamaattumik 3 sòmilitum killeqarfiup iluani maleruagassat, immami avatangiisinik innarlitsaaliuineq pillugu Inatsisartut inatsisaat nr. 15, 8. juni 2017-imeersoq tunngavigalugu aalajangersarneqartut atuutinneqarput. Inatsisissamut allannguut manna tunngavigalugu MARPOL-imi isumaqatigiisummi HFO-p inertequtaanera 3 sòmilit killeqarfiata iluaninnaq atuutissanngilaq, aammali aningaasaqarnikkut killeqarfimmut immikkoortumut atuutissalluni.

Innutaasunut aningaasaqarnikkut allaffissornikkullu sunniutaasussat

Soqanngilaq.

Tusarniaaneq

Avatangiisinut Ministereqarfiup inatsisissatut siunnersuutip Danmarkimi tusarniaassutigineqarnera isumagaa, tamatumalu kingorna inatsisissatut siunnersuut Kalaallit Nunaanni sapaatit akunnerini tamanut ammasumik tusarniaassutigineqarpoq.

Tusarniaanermut akissummik ataatsimik tigusaqartoqarpoq, inatsisissatut siunnersuummut tapersiisumik.

Ilanngussat

Ilanngussaq 1 - Kalaallit Nunaata eqqaani aningaasaqarnermut killeqarfimmi immikkoortumi imartap avatangiisinik innarlitsaaliuinissamut inatsimmut ilaalernissaanut allannguutissatut siunnersuummut missingiut, siullermeerlugu suliarineqarnissaanut atatillugu saqqummiunneqarnera.

Ilanngussaq 2 – Inatsisissatut siunnersuutip naalisarneqarnera